

四庫全書

集部

欽定四庫全書

樂府詩集卷三十八

宋 郭茂倩 輯

相和歌辭

瑟調曲

飲馬長城窟行

古 詞

一曰飲馬行長城秦所築以備胡者其下有泉窟可以飲馬古辭云青青河畔草

縣思遠道言征戍之客至於長城而飲其
馬婦人思念其勤勞故作是曲也酈道元
水經注曰始皇二十四年使太子扶蘇與
蒙恬築長城起自臨洮至於碣石東暨遼
海西並陰山凡萬餘里民怨勞苦故楊泉
物理論曰秦築長城死者相屬民歌曰生
男慎勿舉生女哺用脯不見長城下尸骸
相支柱其冤痛如此今白道南谷口有長

城自城北出有高坂傍有土穴出泉挹之
不窮歌錄云飲馬長城窟信非虛言也樂
府解題曰古詞傷良人遊蕩不歸或云蔡
邕之辭若魏陳琳辭云飲馬長城窟水寒
傷馬骨則言秦人苦長城之役也廣題曰
長城南有溪坂上有土窟窟中泉流漢時
將士征塞北皆飲馬此水也按趙武靈王
既襲胡服自代竝陰山下至高闕為塞山

下有長城武靈王之所築也其山中斷望之若雙闕所謂高闕者焉古今樂錄曰王僧虔技錄云飲馬行今不歌

青青河畔草
絲絲思遠道
遠道不可思
宿昔夢見之
夢見在我傍
忽覺在他鄉
他鄉各異縣
展轉不相見
枯桑知天風
海水知天寒
入門各自媚
誰肯相為言
客從遠方來
遺我雙鯉魚
呼兒烹鯉魚
中有尺素書
書長跪讀素書
書中竟何如
上言加餐飯
下言長相憶

同前

魏文帝

浮舟橫大江討彼犯荆虜武將齊貫甲
征人伐金鼓長戟十萬隊幽冀百石弩
發機若雷電一發連四五

同前

陳琳

飲馬長城窟水寒傷馬骨往謂長城吏
慎莫稽留太原卒官作自有程舉築諧
汝聲男兒寧當格鬪死何能怫鬱築長
城長城何連連連連三千里邊城多健
少內舍多寡婦作書與內舍便嫁莫留
住善事新姑嫜時時念

我故夫子報書往邊地君今出語一何鄙身在禍難中
何為稽留他家子生男慎莫舉生女哺用脯君獨不見
長城下死人骸骨相撐拄結髮行事君慊慊心意闕邊
地苦賤妾何能久自全

同前

傅玄

青青河邊草悠悠萬里道草生在春時遠道還有期春
至草不生期盡歎無聲感物懷思心夢想發中情夢君
如鴛鴦比翼雲間翔既覺寂無見曠如參與商河洛自

用固不如中岳安回流不及反浮雲往自還悲風動思
心悠悠誰知者懸景無停居忽如馳駟馬傾耳懷音響
轉目淚雙墮生存無會期要君黃泉下

同前

陸機

驅馬陟陰山山高

一作陰

馬不前往問陰山候勁虜在燕

然戎車無停軌旌旆屢徂遷仰憑積雪巖俯涉堅冰川
冬來秋未反去家邈以繇獫狁亮未夷征人豈徒旋末
德爭先鳴凶器無兩全師克薄賞行軍沒微軀捐將遵

甘陳迹收功單于旃振旅勞歸士受爵橐街傳

同前

沈約

介馬渡龍堆塗縈馬屢迴前訪昌海驛雜種寇輪臺旌
幕卷烟雨徒御犯冰埃

同前

陳後主

征馬入他鄉山花此夜光離羣嘶向影因風屢動香月
色含城暗秋聲雜塞長何以酬君子馬草報疆場

同前

張正見

秋草朔風驚飲馬出長城羣驚還怯飲地險更宜行傷
水斂凍足畏冷急寒聲無因度吳坂方復入羌城

同前

王 褒

北走長安道征騎每經過戰垣臨八陣旌門對兩和屯
兵戍隴北飲馬傍城阿雪深無復道冰合不生波塵飛
連陣聚沙平騎跡多昏昏隴坻月耿耿霧中河羽林猶
角觝將軍尚雅歌臨戎常拔劍蒙險屢提戈秋風鳴馬
首薄暮欲如何

同前

尚師

長城征馬度橫行且勞羣入冰穿凍水飲浪聚流文澄
鞍如清月照影若流雲別有長松氣自解逐將軍

同前

隋煬帝

肅肅秋風起悠悠行萬里萬里何所行橫漠築

一作長

城豈台小子智先聖之所營樹茲萬世策安此億兆生
詎敢憚焦思高枕於上京北河東武節千里卷戎旌山
川互出沒原野窮超忽擬金止行陣鳴鼓興士卒千乘

萬騎動飲馬長城窟
秋昏塞外雲霧暗關山月緣巖驛
馬上乘空烽火發借問長安侯單于入朝謁濁氣靜天
山晨光照高闕釋兵仍振旅要荒事方舉飲至告言旋
功歸清廟前

同前

唐太宗

塞外悲風切交河水已結瀚海百重波陰山千里雪迴
戍危烽火層巒引高節悠悠卷旆旌飲馬出長城寒沙
連騎迹朔吹斷邊聲胡塵清玉塞羌笛韻金鉦絕漠千

戈戟車徒振原隰都尉反龍堆將軍旋馬邑揚麾氛霧
靜紀石功名立荒裔一戎衣雲臺凱歌入

同前

虞世南

馳馬渡河干流深馬渡難前途錦車使都護在樓蘭輕
騎猶銜勒疑兵尚解鞍溫池一作泉下絕澗棧道接危巒

拓地勲未賞亡城律詎寬有月關猶暗經春隴尚寒雲
昏無復影冰合不聞湍懷君不可遇聊持報一餐

同前

袁朗

朔風動秋草清蹕長安道長城連不窮所以隔華戎規
模唯聖作荷負曉成功鳥庭已向內龍荒更鑿空玉闕
塵卷靜金微路已通湯征隨北怨舜詠起南風畫野功
初立綏邊事云集朝服踐狼居凱歌旋馬邑山響傳鳳
吹霜華藻瓊釵屬國擁節歸單于款關入日落寒雲起
驚河被原隰零落葉已寒河流清且急四時徭役盡千
載干戈戢太平今若斯汗馬竟無施唯當事筆硯歸去
草封禪

同前

王瀚

長安少年無遠圖一生惟羨執金吾
騏驎前殿拜天子走馬爲君西擊胡
胡沙獵獵吹人面漢虜相逢不相見
遙聞鼙鼓動地來傳道單于夜猶戰
此時顧恩寧顧身爲君一行摧萬人
壯士揮戈回白日單于滅血染朱輪
回來飲馬長城窟長城道傍多白骨
問之耆老何代人云是秦王築城卒
黃昏塞北無人烟鬼哭啾啾聲沸天
無罪見誅功不賞孤魂流落此城邊
當昔秦王按劍起

諸侯膝行不敢視富國疆兵二十年築怨興徭九千里
秦王築城何太愚天寶亡秦非北胡一朝禍起蕭牆內
渭水咸陽不復都

同前

王建

長城窟長城窟邊多馬骨古來此地無井泉賴得秦家
築城卒征人飲馬愁不回長城變作望鄉堆蹄跡未乾
人去近續後馬來泥汙盡枕弓睡着待水生不見陰山
在前陣馬蹄足脫裝馬頭健兒戰死誰封侯

同前

僧子蘭

游客長城下飲馬長城窟馬嘶聞水腥為浸征人骨豈
不是流泉終不成潺湲洗盡骨上土不洗骨中冤骨若
不流水四海有還魂空流嗚咽聲聲中疑是言

青青河畔草

王融

容容寒烟起翹翹望行子行子殊未歸寤寐若容輝夜
中心愛促覺後阻河曲河曲萬里餘情交襟袖疎珠露
春華返璿霜秋照晚入室怨蛾眉情歸為誰婉

同前

沈約

漠漠牀上塵心中憶故人故人不可憶中夜起歎息歎
息想容儀不言長別離別離稍已久空牀寄酒杯

同前

何遜

春蘭已應好折花望遠道秋夜苦復長抱枕向空牀吹
臺下促節不言於此別歌筵掩團扇何時一相見弦絕
斷一作猶依軫葉落裁下枝即此雖云別方我未成離

同前

梁武帝

幕幕繡戶絲悠悠懷昔期昔期久不歸鄉國曠音輝音
輝空結遲半寢覺如至既寤了無形與君隔平生月以
雲掩光葉似霜推老當途競自容莫肯為妾道

同前

荀昶

熒熒山上火苔苔隔隴左隴左不可至精爽通寤寐寤
寐衾幃同忽覺在他邦他邦各異邑相逐不相及迷墟
在望烟木落知水堅升朝各自進誰肯相攀牽客從北
方來遺我端弋絳命僕開端弋中有隱起珪長跪讀隱

珪辭苦聲亦悽上言各努力下言長相懷

泛舟橫大江

梁簡文帝

魏文帝飲馬長城窟行曰泛舟橫大江因
以為題也

滄波白日暉遊子出王畿旁望重山轉前觀遠帆稀
廣水浮雲吹江風引夜衣旅雁同洲宿寒鳧夾浦飛
行客誰多病當念早旋歸

同前

張正見

大江脩且濶揚舲度回磯波中畫鷁涌帆上錦花飛舟
移歷浦月櫂舉溼春衣王孫客若遠詎待送將歸

上畱田行

魏文帝

古今樂錄曰王僧虔技錄有上畱田行今
不歌崔豹古今注曰上畱田地名也人有
父母死不字其孤弟者隣人為其弟作悲
歌以風其兄注曰上畱田樂府廣題曰益
漢世人也云里中有啼兒似類親父子回

車問啼兒慷慨不可止

居世一何不同上畱田富人食稻與粱上畱田貧子食
糟與糠上畱田貧賤亦何傷上畱田祿命懸在蒼天上
畱田今爾歎息將欲誰怨上畱田

同前

陸機

嗟行人之藹藹駿馬陟原風馳輕舟汎川雷邁寒往暑
來相尋零雪霏霏集宇悲風徘徊入襟歲華冉冉方除
我思纏綿未紓感時悼逝悽如

同前

謝靈運

薄遊出彼東道上留田薄遊出彼東道上留田循聽一
何轟轟上留田澄川一何皎皎上留田悠哉過矣征夫
上留田悠哉過矣征夫上留田兩服上阪電遊上留田
舫舟下遊颺驅上留田此別既久無適上留田此別既
久無適上留田寸心繫在萬里上留田尺素遵此千夕
上留田秋冬迭相去就上留田秋冬迭相去就上留田
素雪紛紛鶴委上留田清風颺颺入袖上留田歲云暮

矣增憂上畱田歲云暮矣增憂上畱田誠知運來詎抑
上畱田熟視年往莫畱上畱田

同前

梁簡文帝

正月土膏初欲發天馬照耀動農祥田家斗酒羣栢勞
為歌長安金鳳凰

同前

李白

行至上畱田孤墳何崢嶸積此萬古恨春草不復生悲
風四邊來腸斷白楊聲借問誰家地埋沒萬里塋古老

向余言言是上畱田蓬科馬鬣今已平昔之弟死尤不
葬他人於此舉銘旌一鳥死百鳥鳴一獸走百獸驚恒
山之禽別離苦欲去迴翔不能征田氏倉卒骨肉分青
天白日摧紫荊交柯之木本同形東枝顛顛西枝榮無
心之物尚如此參商胡乃尋天兵孤竹延陵讓國揚名
高風緬邈積波激清尺布之誼塞耳不能聽

同前

僧貫休

父不父兄不兄上畱田蝥賊生徒陟崗淚崢嶸我欲使

諸凡鳥雀盡變為鵲鴿我欲使諸凡草木盡變為田荆
隣人歌隣人歌古風清清風生

新城安樂宮

梁簡文帝

古今樂錄曰王僧虔技錄有新城安樂宮
行今不歌樂府解題曰新城安樂宮行備
言雕飾刻斲之美也

遙看雲霧中刻桷映丹紅珠簾通晚日金華拂夜風欲
知歌管處來過安樂宮

同前

陰鏗

新宮實壯哉雲裏望樓臺迢遞翔鷗仰聯翩賀燕來重
寒露簷宿返景夏蓮開砌石披新錦花梁畫早梅欲知
安樂盛歌管雜塵埃

同前

陳子良

春色照蘭宮秦女且牕中柳葉來看上桃花落臉紅拂
塵開扇匣卷帳却薰籠衫薄偏增日裙輕更畏風

安樂宮

李賀

深

一作漆

井桐烏起尚復牽清水未盥邵陵王瓶中弄長

翠新城安樂宮宮如鳳凰翅歌迴蠟板鳴大綰提壺使

一作左綰
提壺使

綠繁悲水曲茱萸別秋子

婦病行

古辭

婦病連年累歲傳呼丈人前一言當言未及得言不知
淚下一何翩翩屬累君兩三孤子莫我兒飢且寒有過
慎莫笄笄行當折搖思復念之亂曰抱時無衣襦復無
裏閉門塞牖舍孤兒到市道逢親交泣坐不能起從乞

求與孤買餌對交啼泣淚不可止我欲不傷悲不能已
探懷中錢持授交入門見孤兒啼索其母抱徘徊空舍
中行復爾耳棄置勿復道

同前

江總

窈窕懷貞室風流挾琴婦唯將角枕卧自影啼妝久羞
開翡翠帷嬾對蒲萄酒深悲在縑素託意忘簪帶夫婿
府中趨誰能大垂手

孤兒行

孤子生行一曰孤兒行古辭言孤兒為兄
嫂所苦難與久居也歌錄曰孤子生行亦
曰放歌行樂府解題曰鮑照放歌行云蓼
蟲避葵堇言朝廷方盛君上好才何為臨
歧相將去也

孤兒生孤子遇生命獨當苦父母在時乘堅車駕駟馬
父母已去兄嫂令我行賈南到九江東到齊與魯臘月
來歸不敢自言苦頭多蟣虱面目多塵大兄言辦飯大

嫂言視馬上高堂行取殿下堂孤兒淚下如雨使我朝
行汲暮得水來歸手為錯足下無菲愴愴履霜中多蒺
藜拔斷蒺藜腸月中愴欲悲淚下漉漉清涕纍纍冬無
複襦夏無單衣居生不樂不如早去下從地下黃泉春
氣動草萌芽三月蠶桑六月收瓜將是瓜車來到還家
瓜車反覆助我者少啗瓜者多願還我蒂兄與嫂嚴獨
且急歸當與校計亂曰里中一何譊譊願欲寄尺書將
與地下父母兄嫂難與久居

放歌行

傅玄

靈龜有枯甲神龍有腐鱗人無千歲壽存質空相因朝
露尚移景促哉水上塵丘冢如履綦不識故與新高樹
來悲風松柏垂威神曠野何蕭條顧望無生人但見孤
狸迹虎豹自成羣孤雛攀樹鳴離鳥何繽紛愁子多哀
心塞耳不忍聞長嘯淚雨下太息氣成雲

同前

鮑照

夢蟲避葵堇習苦不言非一作小人自齷齪安知曠士

懷鷄鳴洛城裏禁門平旦開冠蓋縱橫至車騎四方來
素帶曳長飈華纓結遠埃日中安能止鍾鳴猶未歸夷
世不可逢賢君信愛才明慮自天斷不受外嫌猜一言
分珪爵片善辭草萊豈伊白璧賜將起黃金臺今君有
何疾臨路獨遲回

同前

王昌齡

南渡洛陽津西望十二樓明堂坐天子月朔朝諸侯清
樂動干門皇風被九州慶雲從東來決滯抱日流昇平

貴論道文墨將何求有詔徵草澤微誠獻謀猷冠冕如
星羅拜揖曹與周望塵非吾事入賦且遲留幸蒙國士
識因脫負薪裘今者放歌行以慰梁甫愁但營數斗祿
奉養母豐羞若得金膏遂飛雲亦可儔



樂府詩集卷三十八

欽定四庫全書

集部

樂府詩集卷

三十九至
四十一

詳校官庶吉士

臣柳邁祖

助教

臣常循覆勘

總校官知縣

臣繆琪

校對官編修

臣秦瀛

謄錄監生

臣孫承基

欽定四庫全書

樂府詩集卷三十九

宋 郭茂倩 輯

相和歌辭

瑟調曲

大牆上蒿行

古今樂錄曰王僧虔技錄有大牆上蒿行
今不歌

陽春無不長成草木羣類隨大風起零落若何翩翩中
心獨立一何勞四時舍我驅馳令我隱約欲何為人生
居天壤間忽如飛鳥棲枯枝我今隱約欲何為適君身
體所服何不恣君口腹所嘗冬被貂氈溫暖夏當服綺
羅輕涼行力自苦我將欲何為不及君少壯之時乘堅
車策肥馬良上有倉浪之天令我難得久來視下有蠕
蠕之地令我難得久來履何不恣意遨遊從君所喜帶
我寶劍今爾何為自低卬悲麗平壯觀白如積雪利若

秋霜駁犀標首玉琢中央帝王所服辟除凶殃御左右
奈何致福祥吳之辟閭越之步光楚之龍泉韓有墨陽
苗山之鋌羊頭之鋼知名前代咸自謂麗且美曾不知
君劒良綺難忘冠青雲之崔嵬織羅為纓飾以翠翰既
美且輕表容儀俯仰垂光榮宋之章甫齊之高冠亦自
謂美蓋何足觀排金鋪坐玉堂風塵不起天氣清涼奏
桓瑟舞趙倡女娥長歌聲協宮商感心動耳蕩氣回腸
酌桂酒鱸鯪魴與佳人期為樂康前奉玉卮為我行觴

今日樂不可忘樂未央為樂常苦遲歲月逝忽若飛何
為自苦使我心悲

野田黃雀行四解

曹植

古今樂錄曰王僧虔技錄有野田黃雀行
今不歌樂府解題曰晉樂奏東阿王置酒
高殿上始言豐膳樂飲盛賓主之獻酬中
言歡極而悲嗟盛時不再終言歸於知命
而無憂也空侯引亦用此曲按漢鼓吹鏡

歌亦有黃雀行不知與此同否

置酒高殿上親交從我遊中厨辦豐膳烹羊宰肥牛秦
箏何慷慨齊瑟和且柔

解一

陽阿奏竒舞京洛出名謳樂

飲過三爵緩帶傾庶羞主稱千金壽賓奉萬年酬

解二

久

要不可忘薄終義所尤謙謙君子德磬折欲何求盛時

不再來百年忽我道

解三

驚風飄白日光景馳西流生存

華屋處零落歸山丘先民誰不死知命復何憂

解四

右一曲晉樂所奏

置酒高殿上親交從我遊中厨辦豐膳烹羊宰肥牛秦
箏何慷慨齊瑟和且柔陽阿奏奇舞京洛出名謳樂飲
過三爵緩帶傾庶羞主稱千金壽賓奉萬年酬久要不
可忘薄終義所尤謙謙君子德磬折欲何求驚風飄白
日光景馳西流盛時不再來百年忽我遒生存華屋處
零落歸山丘先民誰不死知命復何憂

右一曲本辭

同前

高樹多悲風海水揚其波利劍不在掌結友何須多不
見籬間雀見鷁自投羅羅家得雀喜少年見雀悲拔劍
捎羅網黃雀得飛飛飛磨蒼天來下謝少年

同前

蕭 轂

弱軀媿

一作慙

彩飾輕毛非錦文不知鴻鵠志非是鳳凰

羣作風隨濁雨入曲應玄雲空城舊侶絕滄海故交分
寧死明珠彈且避鷹將軍

同前

李 白

遊莫逐炎洲翠棲莫近吳宮鶯吳宮火起焚爾窠炎洲
逐翠遭網羅蕭條兩翅蓬蒿下縱有鷹鷂奈若何

同前

儲光義

嘖嘖野田雀不知軀體微間穿深蒿裏爭食復爭飛窮
老一積舍棗多桑樹稀無棗猶可食無桑何以衣蕭條
空倉算相引時來歸邪路豈不棲諸田豈不肥水長路
且壞惻惻與心違

同前

僧貫休

高樹風多吹爾巢落深蒿葉暖宜爾依薄莫近鶚類珠
網亦惡飲野田之清水食野田之黃粟深花中睡墀土
裏浴如此即全勝啄太倉之穀而更穿人屋

同前

僧齊已

雙雙野田雀上下同飲啄暖去棲蓬蒿寒歸傍籬落殷
勤避羅網乍可遇鵙鵙鵙雖不仁分明在寥廓

置酒高殿上

張正見

陳王開甲第粉壁麗椒塗高窓侍玉女飛闥敞金鋪名

香散綺幕石墨彫金鑪清醪稱玉饋浮蟻擅蒼梧鄒嚴
恒接武申白日相趨容與升階玉差池曳履珠千金一
巧笑百萬兩鬟姝趙姬未鼓瑟齊客罷吹竽歌喧桃與
李琴挑鳳將雛魏君慙舉白晉主媿投壺風雲更代序
人事有榮枯長卿病消渴壁立還成都

同前

江總

三清傳旨酒栢梁奉歡宴霜雲動玉葉凍水疎金箭羽
箭響鐘石流泉灌金殿盛時不再得光景馳如電

雁門太守行八解

古辭

古今樂錄曰王僧虔技錄云雁門太守行
歌古洛陽令一篇後漢書曰王渙字稚子
廣漢鄆人也父順安定太守渙少好俠尚
氣力晚改節敦儒學習書讀律略通大義
後舉茂才除溫令討擊姦猾境內清夷商
人露宿於道其有放牛者輒云以屬稚子
終無侵犯在溫三年遷兗州刺史繩正風

部威大行後坐考妖言不實論歲餘徵拜
侍御史永元十五年還為洛陽令政平訟
理發擿姦伏京師稱歎以為有神算元興
元年病卒百姓咨嗟男女老壯相與致奠
馱以千數及喪西歸經宏農民庶皆設槃
按於路吏問其故咸言平常持米到洛為
卒司所抄恒亡其半自王君在事不見侵
枉故來報恩其政化懷物如此民思其德

為立祠安陽亭西每食輒弦歌而薦之永
嘉二年鄧太后詔嘉其節義而以子石為
郎中延熹中桓帝事黃老道悉毀諸旁祀
唯存卓茂與渙祠焉樂府解題曰按古歌
詞歷述渙本末與傳合而曰雁門太守行
所未詳若梁簡文帝輕霜中夜下備言邊
城征戰之思皇甫規雁門之問蓋據題為
之也

孝和帝在時洛陽令王君本自益州廣漢蜀民少行宦

學通五經論

解一

明知法令歷世衣冠從溫補洛陽令治

行致賢擁護百姓子養萬民

解二

外行猛政內懷慈仁文

武備具料民富貧移惡子姓篇著里端

解三

傷殺人比伍

同罪對門禁釐矛八尺捕輕薄少年加笞決罪詣馬市

論

解四

無妄發賦念在理寃敕吏正獄不得苛煩財用錢

三十買繩禮竿

解五

賢哉賢哉我縣王君臣吏衣冠奉事

皇帝功曹主簿皆得其人

解六

臨部居職不敢行恩青身

苦體夙夜勞勤治有能名遠近所聞七解天年不遂早就

一作就

奄昏為君作祠安陽亭西欲令後世莫不稱傳八解

右一曲晉樂所奏

同前二首

梁簡文帝

輕霜中夜下黃葉遠辭枝寒苦春難覺邊城秋易知風
急旂旗斷塗長鎧馬疲少解孫吳法家本幽并兒非關
買雁肉徒勞皇甫規

隴暮風恒急關寒霜自濃
捩馬夜方思邊衣秋未重潛

師夜接戰略地曉摧鋒悲笳動明塞高旗出漢墉勤勞
謝公業清白報迎逢非須主人賞寧期定遠封單于如
未擊終夜慕前蹤

同前

褚翔

三月楊花合四月麥秋初幽州寒食罷鄭國採桑疎便
聞雁門戍結束事戎車去歲無霜雪今年月閏餘月如
弦上弩星類水中魚戎車攻日逐燕騎蕩康居大宛歸
善馬小月送降書寄語閨中妾勿怨寒牀虛

同前

李賀

黑雲壓城城欲摧甲光向月

一作日

金鱗開角聲滿天秋

色裏塞上燕支凝夜紫半卷紅旗臨易水霜重鼓寒聲

不起

一作鼓聲
寒不起

報君黃金臺上意提攜玉龍為君死

同前

張祜

城頭月沒霜如水
赳赳踏沙人似鬼
燈前拭淚試香裘
長引一聲殘漏子
駝囊瀉酒酒一杯
前頭唳血心不回
寄語年少妻莫哀
魚金虎竹天上來
雁門山邊骨成灰

同前

莊南傑

旌旗閃閃搖天末
長笛橫吹虜塵闊
跨下嘶風白練獰
腰間切玉清蛇活
擊草縱金燧牛尾
犬羊兵敗如山死
九泉寂寞葬秋蟲
濕雲荒草啼秋思

豔歌何嘗行四解

古詞

一曰飛鵠行古今樂錄曰王僧虔技錄云
豔歌何嘗行歌文帝何嘗古白鵠二篇樂
府解題曰古辭云飛來雙白鵠乃從西北

來言雌病雄不能負之而去五里一反顧
六里一徘徊雖遇新相知終傷生別離也
又有古辭云何嘗快獨無憂不復為後人
所擬鵠一作鶴

飛來雙白鵠乃

一作又

從西北來十五五羅列成行

解

妻卒被病行不能相隨五里一反顧六里一徘徊

解二吾

欲銜汝去口噤不能開吾欲負汝去毛羽何摧積

解三樂

哉新相知憂來生別離躊躇顧羣侶淚下不自知

解四念

與君離別氣結不能言
各各重自愛遠道歸還難
妾當守空房閉門下重闕
若生當相見亡者會黃泉
今日樂相樂延年萬歲期

念與下為起

同前五解

魏文帝

何嘗快獨無憂但當飲醇酒炙肥牛

解一長兄為二千石

中兄被貂裘

解二

小弟雖無官爵鞍馬馭馭往來王侯長

者遊

解三

但當在王侯殿上快樂擣蒲六博對坐彈碁

解四

男兒居世各當努力蹠迫日暮殊不久留

解五

少小相觸

抵寒苦常相隨念恚安足諍吾中道與卿共別離約身
奉事君禮節不可虧上慙滄浪之天下顧黃口小兒奈
何復老心皇皇獨悲誰能知

少小下為趙
曲前為豔

右二曲晉樂所奏

飛來雙白鵠

吳邁遠

可憐雙白鵠雙雙絕塵氛連翩弄光景交頸遊青雲逢
羅復逢繳雌雄一旦分哀聲流海曲孤叫去江濱豈不
慕前侶為爾不及羣步步一零淚千里猶待君樂哉新

相知悲來生別離持此百年命共逐寸陰移譬如空山
草零落心自知

飛來雙白鶴

陳後主

朔吹已蕭瑟愁雲屢合開玄冬辛苦地白鶴從風催音
響已清切毛羽復殘摧飛未進

闕

但為失雙回儻逢

闕
曾德當共銜珠來

同前

梁元帝

紫蓋學仙成能令吳市傾逐舞隨疎節聞琴應別聲集

田遙赴影隔霧近相鳴時從洛浦渡飛向遼東城

同前

虞世南

飛來雙白鶴奮翼遠凌烟雙棲集紫蓋一舉背青田
颺影過伊洛流聲入管絃鳴羣倒景外刷羽閭風前
映海疑浮雲拂澗瀉飛泉燕雀寧知去蜉蝣不識還
何言別儔侶從此間山川顧步已相失徘徊反自憐
危心猶警露哀響詎聞天無因振六翮輕舉復隨仙

今日樂相樂

江總

綺殿文雅適玳筵歡趣密鄭態逶迤舞齊弦窈窕瑟金
罍送縹觴玉井沈朱實願以一作此北堂宴長奉南山日

豔歌行

古辭

古今樂錄曰豔歌行非一有直云豔歌即
豔歌行是也若羅敷何嘗雙鴻福鍾等行
亦皆豔歌王僧虔技錄云豔歌雙鴻行荀
錄所載雙鴻一篇豔歌福鍾行荀錄所載
福鍾一篇今皆不傳豔歌羅敷行日出東

南陽篇荀錄所載羅敷一篇相如中歌之
今不歌樂府解題曰古辭云翩翩堂前燕
冬藏夏來見言燕尚冬藏夏來兄弟反流
宕他縣主婦為綻衣服其夫見而疑之也
翩翩堂前燕冬藏夏來見兄弟兩三人流宕在他縣故
衣誰當補新衣誰當綻賴得賢主人覽取為吾組夫婿
從門來斜柯西北眄語卿且勿眄水清石自見石見何
累累豈遠行不如歸

同前

南山石鬼鬼松栢何離離上枝拂青雲中心十數圍洛陽發中梁松樹竊自悲斧鋸截是松松樹東西摧特作四輪車載至洛陽宮觀者莫不歎問是何山材誰能刻鏤此公輸與魯班被之用丹漆薰用蘇合香本自南山松今為宮殿梁

豔歌行有女篇

傳 玄

有女懷芬芳娉娉步東廂蛾眉分翠羽明眸發清揚丹

唇翳皓齒秀色若珪璋巧笑雲權厖衆媚不可詳令儀

希世出無乃古毛嬙頭安金步搖

一作首戴金步搖

耳繫明月

璫珠環約素腕翠羽垂鮮光文袍綴藻黼玉體映羅裳
容華旣已豔志節擬秋霜微音冠青雲聲響流四方妙
哉英媛德宜配侯與王靈應萬世合日月時相望媒氏
陳束帛羔雁鳴前堂百兩盈中路起若鸞鳳翔凡夫徒
踴躍望絕殊參商

豔歌行

劉義恭

江南遊湘妃窈窕漢濱女淑問流古今蘭音媚鄭楚瑤
顏映長川善服照通許求思望襄瀝歎息對衡渚中情
未相感搔首增企予悲鴻失良匹俯仰戀儔侶徘徊忘
寢食羽翼不能舉傾首佇春鶯為我津辭語

同前二首

梁簡文帝

凌晨光景麗倡女鳳樓中前瞻削成小傍望卷旌空分
妝間淺靨繞臉傳斜紅張琴未調軫飲吹不全終自知
心所愛出入仕秦宮誰言連尹屈更是莫教通輕軫綴

皂蓋飛轡轢雲驄金鞍隨繫尾銜璫映纏駿戈鏤荆山
玉劒飾丹陽銅左把蘇合彈傍持大屈弓控弦因鵲血
挽彊用牛螭弋獵多登隴酣歌每入豐暉暉隱落日丹
冉還房櫳燈生陽燧火塵散鯉魚風流蘇時下帳象簾
復韜筒霧暗牕前柳寒疎井上桐女蘿託松際甘瓜蔓
井東拳拳恃君寵歲暮望無窮

雲楣桂成戶飛棟杏為梁斜窓通藥氣細隙引塵光裁
衣魏后尺汲水淮南床青驪莫當返預使羅裙香

同前

顧野王

燕姬妍趙女麗出入王宮公主第
倚鳴瑟歌未央調弦八九弄度曲兩三章
唯欣春日永詎愁秋夜長歌未央
倚鳴瑟輕風飄落葉

闕

巢蘭室結羅帷翫朝日窓開

翠幌卷妝罷金星出爭攀四照花競戲三條術

夕臺行雨度朝梁照日輝東城採桑返南市數錢歸長
歌挑碧玉羅塵笑洛妃欲知歡未盡棲夜已烏飛

齊倡趙女盡妖妍珠簾玉砌併神仙莫笑人來最落後

能使君恩得度前
豈知洛渚羅塵步
詎減天河秋夕渡
妖姿巧笑能傾城
那思他人不憎妬
蓮花藻井推菱荷
採菱妙曲勝陽阿

煌煌京洛行五解

魏文帝

古今樂錄曰王僧虔技錄云煌煌京洛行
歌文帝園桃一篇樂府解題曰晉樂奏文
帝天天園桃無子空長言虛美者多敗又
有韓信高鳥盡良弓藏子房保身全名蘇

秦傾側賣主陳軫忠而有謀楚懷不納郭
生古之雅人燕昭臣之吳起知小謀大及
魯仲連高士不受千金等語若宋鮑照鳳
樓十二重梁戴嵩欲知佳麗地始則盛稱
京洛之美終言君恩歇薄有怨曠沈淪之
歎

天天園桃無子空長虛美難假偏輪不行解淮陰五刑
鳥得弓藏保身全名獨有子房大憤不收褒衣無帶多

言寡誠祇令事敗

解二

蘇秦之說六國以側身賣主車

裂固當賢矣陳軫忠而有謀楚懷不從禍卒不救

解三禍

夫吳起智小謀大西河何健伏尸何劣

解四

嗟彼郭生古

之雅人智矣燕昭可謂得臣我我仲連齊之高士北辭

千金東蹈滄海

解五

右一曲晉樂所奏

同前二首

鮑照

鳳樓十二重四戶八綺窓繡桷金蓮花桂柱玉盤龍珠

簾無隔路羅幌不勝風寶帳三千所為爾一朝容揚芬
紫烟上垂彩綠雲中春吹回白日霜歌落塞鴻但懼秋
塵起盛愛逐衰蓬坐視青苔滿卧對錦筵空琴瑟縱橫
散舞衣不復縫古來共歇薄君意豈獨濃唯見雙黃鵠
千里一相從

南遊偃師縣斜上霸陵東迴瞻龍首堞遙望德陽宮重
門遠照耀天閣復穹隆城傍疑複道樹裏識松風黃河
入洛水丹泉統射熊夜輪懸素魄朝天蕩碧空秋霜曉

驅雁春雨暗成虹
曲陽造甲第高安還禁中
劉蒼歸作相
竇憲出臨戎
此時車馬合
茲晨冠蓋通
誰知兩京盛
歡宴遂無窮

同前

戴嵩

欲知佳麗地為君陳帝京
由來稱俠窟爭利復爭名
鑄銅門外馬刻石水中鯨
黑龍過飲渭丹鳳俯臨城
羣公邀郭解天子問黃瓊
詔幸平陽地騎指伏波營
五侯同拜爵七貴各垂纓
衣風飄飄起車塵暗浪生
舞見淮南

法歌聞齊后聲揮金留客坐饌玉待鐘鳴獨有文園客
偏嗟武騎輕

同前

張正見

千門儼西漢萬戶擅東京凌雲霞上起鳩鵲月中生風
塵暮不息一作歌簫笳夜恒鳴唯當賣藥處不入長安城

樂府詩集卷三十九

欽定四庫全書

樂府詩集卷四十

宋 郭茂倩 輯

相和歌辭

瑟調曲

門有車馬客行

陸 機

古今樂錄曰王僧虔技錄云門有車馬客
行歌東阿王置酒一篇樂府解題曰曹植

等門有車馬客行皆言問訊其客或得故
舊鄉里或駕自京師備叙市朝遷謝親友
彫喪之意也按曹植又有門有萬里客亦
與此同

門有車馬客駕言發故鄉念君久不歸濡跡涉江湘投
袂赴門塗攬衣不及裳拊膺攜客泣掩淚叙溫涼借問
邦族間惻愴論存亡親友多零落舊齒皆凋喪市朝互
遷易城闕或丘荒墳壟日月多松柏鬱茫茫天道信崇

替人生安得長慷慨惟平生俛仰獨悲傷

同前

鮑照

門有車馬客問君何鄉士捷步往相訊果得

一作舊隣

里悽悽聲中情慙慙增下俚語昔有故悲論今無新喜

清晨相訪慰日暮不能已歡戚競尋諸

一作叙

談調何終

止辭端竟未究忽唱分塗始前悲尚未弭後戚方復起

嘶聲盈我口談言在我耳手跡可傳心願爾駕行李

同前

張正見

飛觀霞光啟重門，平旦開北闕，高廂過東方，連騎來紅塵。
揚翠轂，赭汗染龍媒，桃花夾逕聚，流水傍池回。捎鞭聊靜電，接軫暫停雷。
非關萬里客，自有六奇才。琴和朝雉操，酒泛夜光杯。舞袖飄金谷，歌聲遶鳳臺。
良時不可再，騶馭鬱相催。安知太行道，失路車輪摧。

同前

何宴

門前車馬客，言是故鄉來。故鄉有書信，縱橫印檢開。
開書看未極，行客屢相識。借問故鄉人，潺湲淚不息。上言

別離久下道望應歸寸心將夜鵲相逐向南飛

同前

虞世南

財雄重交結戚里擅豪華曲臺臨上路高門抵狹斜
赭汗千金馬繡轂五香車白鶴隨飛蓋朱路入鳴笳
夏蓮開劒水春桃發露花輕裙染回雪浮蟻泛流霞
高談辯飛兔摘藻握靈蛇逢恩借羽翼失路委泥沙
曖曖風烟晚路長歸騎遠日衰青瑣第塵飛金谷苑
危弦促柱奏巴渝遺簪墮珥解羅襦如何守直道翻使谷名愚

同前

李白

門有車馬客金鞍曜朱輪謂從丹

一作雲

霄落乃是故鄉

親呼兒掃中堂坐客論悲辛對酒兩不飲停觴淚盈巾
歎我萬里遊飄飄三十春空談霸王略紫綬不挂身雄
劍藏玉匣陰符生素塵廓落無所合流離湘水濱借問
宗黨間多為泉下人生苦百戰役死託萬鬼鄰北風揚
胡沙埋翳周與秦大運且如此蒼穹寧匪仁惻愴竟何
道存亡任大鈞

門有萬里客

曹植

門有萬里客問君何鄉人褰裳起從之果得心所親挽
裳對我泣太息前自陳本是朔方士今為吳越民行行
將復去去去適西秦

牆上難為趨

傅玄

古今樂錄曰王僧虔技錄云牆上難用趨
行荀錄所載牆上一篇今不傳

門有車馬客駢服若騰飛草組結玉珮繁藻紛葳蕤馮

軾垂長纓顧盼有餘輝貧主屣敝履整比藍縷衣客曰
嘉病乎正色意無疑吐言若覆水搖舌不可追渭濱漁
釣翁乃為周所詰顏回處陋巷大聖稱庶幾苟富不知
度千駟賤采薇季孫由儉顯管仲病三歸夫差耽淫侈
終為越所圍遺身外榮利然後享巍巍迷者一何衆孔
難知德希甚美致憔悴不如豚豕肥陽朱泣路歧失道
今人悲子貢欲自矜原憲知其非屈伸各異勢窮達不
同資夫唯體中庸先天天不違

同前

王褒

昔稱梁孟子兼聞魯孔丘訪政聊為述問陳豈相酬末
代多僥倖卿相盡經由臺郎百金價台司千萬求當朝
少直筆趨代皆曲鈎廷尉十年不得調將軍百戰未封
侯夜伏擁門作常伯自有蒲萄得涼州白璧求善價明
珠難暗投高牆不可踐井水自難浮風胡有年歲銛利
比吳鈎

日重光行

陸機

古今樂錄曰王僧虔技錄有日重光行令
不傳崔豹古今注曰日重光月重輪羣臣
為漢明帝作也明帝為太子樂人作歌詩
四章以贊太子之德一曰日重光二曰月
重輪三曰星重輝四曰海重潤漢末喪亂
後二章亡舊說云天子之德光明如日規
輪如月衆輝如星霑潤如海太子比德故
云重也

日重光奈何天回薄日重光冉冉其遊如飛征日重光
今我日華華之盛日重光倏忽過亦安停日重光盛往
衰亦必來日重光譬如四時固恒相催日重光惟命有
分可營日重光但一作常惆悵才志日重光身沒之後無
遺名

月重輪行

魏文帝

三辰垂光照臨四海煥哉何煌煌悠悠與天地久長愚
見目前聖觀萬年明闇相絕何可勝言

同前

魏明帝

天地無窮人命有終立功揚名行之在躬聖賢度量得
為道中

同前

陸機

人生一時月重輪盛年焉可恃一作持月重輪吉凶倚伏

百年莫我與期臨川曷悲悼茲去不從肩月重輪功名
不勗之善哉古人揚聲敷聞九服身名流何穆既自才
難既嘉運亦易愆俛仰行老存沒將何觀志士慷慨獨

長歎獨長歎

同前

戴嵩

皇基屬明兩副德表重輪重輪非是暈桂滿自恒春海
珠含更滅階莫翳且新婕好比團扇曹王譬洛神浮川
疑讓壁入戶類燒銀從來看顧免不曾聞鬪麟北堂豈
盈手西園偏照人

蜀道難二首

梁簡文帝

古今樂錄曰王僧虔技錄有蜀道難行今

不歌樂府解題曰蜀道難備言銅梁玉壘
之阻與蜀國絃頗同尚書談錄曰李白作
蜀道難以罪嚴武後陸暢謁韋南康畢於
蜀郡感韋之遇遂反其詞作蜀道易云蜀
道易易於履平地按銅梁玉壘在蜀郡西
南今永康是也非入蜀道失之遠矣

建平督郵道魚復永安宮若奏巴渝曲時當君思中
巫山七百里巴水三回曲笛聲下復高猿啼斷還續

同前二首

劉孝威

玉壘高無極銅梁不可攀雙流逆巖

一作巖

道九坂涇陽

關鄧侯束馬去王生斂轡還懼身充叱馭奉玉若猶慳
岵山金碧有光輝遷停車馬正輕肥彌思王褒擁節去
復憶相如乘傳歸君平子雲寂不嗣江漢英靈已信稀

同前

陰銓

王尊奉漢朝靈關不憚遙高岷長有雪陰棧屢經燒輪
摧九折路騎阻七星橋蜀道難如此功名詎可要

同前

張文琮

梁山鎮地險積石阻雲端深谷下寥廓層巖上鬱盤飛
梁駕絕嶺棧道接危壑攬轡獨長息方知斯路難

同前

李白

噫吁噉危乎高哉蜀道之難難於上青天蠶叢及魚鳧
開國何茫然爾來四萬八千歲乃一作不與秦塞通人烟

西當太白有鳥道可以橫絕峨眉巔地崩山摧壯士死

然後天梯石棧方一作相鈎連上有六龍迴日之高標一作

橫河斷海
之浮雲

下有衝波逆折之迴川黃鶴之飛尚不得作一

過猿猱欲度愁攀緣青泥何盤盤百步九折紫巖巒捫

參歷井仰脅息以手撫膺坐長歎問君西遊何時還畏

途巉巖不可攀但見悲鳥鳴

一作

號枯

一作

木雄飛呼雌

一作

雌從遶林間又聞子規啼夜月愁空山蜀道之難難於

上青天使人聽此彫朱顏連峰去天不盈尺

一作入烟
幾千尺

枯松倒挂倚絕壁飛湍瀑流爭喧飀砢崖轉石萬壑雷

其嶮也若此嗟爾遠道之人胡為乎來哉劒閣崢嶸而

崔嵬一夫當關萬夫莫開所守或匪親一作人化為狼與

豺朝避猛虎夕避長蛇磨牙吮血殺人如麻錦城雖云

樂不如早還家蜀道之難難於上青天側身西望長咨

嗟一作人

擢歌行五解

魏明帝

古今樂錄曰王僧虔技錄云擢歌行歌明

帝王者布大化一篇或云左延年作今不

歌梁簡文帝在東宮更製歌少異此也樂

府解題曰晉樂奏魏明帝辭云王者布大
化備言平吳之勲若晉陸機遲遲春欲暮
梁簡文帝妾住在湘川但言乘舟鼓櫂而
已

王者布大化配乾稽后祇陽育則陰殺晷景應度移解

解一

文德以時振武功伐不隨重華舞干戚有苗服從媯解

解二

蠢爾吳蜀虜憑江棲山阻哀哉王士民瞻仰靡依怙解

解三

皇上悼愍斯宿昔奮天怒發我許昌宮列舟於長浦解

解四

翌日乘波揚棹歌悲且涼太常拂白日旗幟紛設張解
將抗旄與鉞曜武於彼方伐罪以弔民清我東南疆

將抗

下為
起

右一曲晉樂所奏

同前

陸機

遲遲暮春日天氣柔且嘉元吉隆初已濯穢遊黃河龍
舟浮鷁首羽旗垂藻葩乘風宣飛景逍遙戲中波名謳
激清唱榜人縱擢歌投綸沉洪川飛繳入紫霞

同前

孔甯子

君子樂和節品物待陽時上祖

一作位

降繁祉元已命水

嬉倉武戒橋梁旄人樹羽旗高檣抗飛帆羽蓋翳華枝
欣飛激逸響媚娥吐清辭汨洄緬無分欣流愴有思仰
瞻翳雲繳俯引沈泉絲委羽漫通渚鮮染中填坻鷁鳥
威江使揚波駭馮夷夕影雖已西

闕二字

終無期

同前

吳邁遠

十三為漢使孤劍出臯蘭西南窮天險東北畢地闕岷

山高以峻燕水清且寒一去千里孤邊馬何時還遙望
烟嶂外瘴氣鬱雲端始知身死處平生從此殘

同前

鮑照

羈客離嬰時飄飄無定所昔秋寓江介茲

一作今

春客河

澣往戢于役身願令懷水楚泠泠條疏潭邕邕雁循渚

颶戾長風振遙曳

一作飄遙

高帆舉驚波無留連舟人不躊

佇

同前

梁簡文帝

妾家住湘川菱歌本自便風生解刺浪水深能捉船葉
亂由牽荇絲飄為折蓮濺妝疑薄汗霑衣似故湔浣沙
流暫濁汰錦色還鮮叅同趙飛燕借問李延年從來入
絃管誰在權歌前

同前

劉孝綽

日暮楚江上江深風復生所思竟何在相望徒盈盈舟
子行催櫂無所喝流聲

同前

阮研

金匱八
卷四十
芙蓉始出水綠荇葉初鮮且傳白雪和共奏激楚絃平生此遭遇一日當千年

同前

王籍

揚舲橫大江乘流任蕩蕩輕橈莫不息復逐夜潮上時見湘水仙恒聞解佩響

同前

蕭岑

桂酒既潺湲輕舟亦乘駕鼓枻何吟吟我皇唐化容與滄浪中淹留明月夜

同前

魏 収

雪溜添春浦花水足新流桃發武陵岸柳拂武昌樓

同前

盧思道

秋江見底清越女復傾城方舟共採摘最得可憐名落花流寶珥微吹動香纓帶垂連理溼櫂舉木蘭輕順風

一作
避人

傳細語因波寄遠情誰能結錦纜薄暮隱長汀

棹歌行

駱賓王

寫月圖黃罷凌波拾翠通鏡花搖菱日衣麝入荷風葉

密舟難蕩蓮疎浦易空鳳媒羞自託鴛翼恨難一作無窮
秋帳燈花翠倡樓粉色紅相思無別曲併在棹歌中

同前

徐堅

棹女飾銀鈎新妝下翠樓霜絲青桂楫蘭棧紫霞舟水
落金陵曙風起洞庭秋扣船過曲浦飛帆越回流影入
桃花浪香飄杜若洲洲長殊未返蕭散雲霞晚日下大
江平烟生歸岸遠岸遠聞潮波爭途遊戲多因聲趙津
女來聽採菱歌

蒲坂行

陸厥

古今樂錄曰王僧虔技錄有蒲坂行今不
歌通典曰河東唐虞所都蒲坂也漢為蒲
坂縣春秋時秦晉戰於河曲即其地也

江南風已春河間柳已把雁返無南書寸心何由寫流
泊祁連山飄飄高闕下

同前

劉遵

漢使出蒲坂去去往交河間謀敢虧對驂馬脫鳴珂乍

作渡瀘怨何辭上隴歌

白楊行

傅玄

古今樂錄曰王僧虔技錄有白楊行今不
歌

青雲固非青當雲奈白雲驥從西北馳來吾何憶驥來
對我悲鳴舉頭氣凌青雲當奈此驥正龍形踠足蹉跎
長坡下蹇驢慷慨敢與我爭馳躑躅鹽車之中流汗兩
耳盡下垂雖懷千里之逸志當時一得施白雲影影舍

我高翔青雲徘徊戢我愁啼上眄層崖下臨清池日欲
西移既來歸君君不一顧仰天太息當用生為青乎雲
飛時悲當奈何邪青雲飛乎

胡無人行

徐摛

古今樂錄曰王僧虔技錄有胡無人行今
不歌

刻楹登魯殿擁絮拭胡妝猶將漢閨曲誰忍奏氍毹房遙
憶甘泉夜閣淚斷人腸

同前

吳均

劍頭利如芒恒持照眼光鐵騎追驍虜金羈討黠羌
高秋八九月胡地草風霜男兒不惜死破膽與君嘗

同前

徐彥伯

十月繁霜下征人遠鑿空雲搖錦更節海照角端弓暗
磧埋沙樹衝飈卷塞蓬方隨膜拜入歌舞玉門中

同前

聶夷中

男兒徇大義立節不沽名腰間懸陸離大歌胡無行不

讀戰國書不覽黃石經
醉卧咸陽樓夢入受降城
更願生羽儀飛身入青冥
請携天子劍斫下旄頭星
自然胡無人雖有無爭戰
悠哉典屬國驅羊老一生

同前

李白

嚴風吹霜海草凋
筋幹精堅胡馬驕
漢家戰士三十萬
將軍兼領一作誰者霍嫖姚
流星白羽腰間插
劍花秋蓮光

出匣天兵照雪下
玉關虜箭如沙射
金甲雲龍風虎盡
交迴太白八月敵
可摧敵可摧旄頭滅
履胡之腸涉胡

血懸胡青天上埋胡紫塞旁胡無人漢道昌陛下之壽
三千霜但歌大風雲飛揚安得猛士兮守四方胡無人
漢道昌

一本無此六字

同前

僧貫休

霍嫖姚趙充國天子將之平朔漠肉胡之肉燼胡帳幄
千里萬里惟留胡之空殼邊風蕭蕭榆葉初落殺氣盡
赤枯骨夜哭將軍旣立殊勲遂有胡無人曲我聞之天
子富有四海德被無垠但令一物得所八表來賓亦何

必令彼胡無人

樂府詩集卷四十

欽定四庫全書

樂府詩集卷四十一

宋 郭茂倩 輯

相和歌辭

楚調曲

古今樂錄曰王僧虔技錄楚調曲有白頭
吟行泰山吟行梁甫吟行東武琵琶吟行
怨詩行其器有笙笛弄節琴箏琵琶瑟七

種張永錄云未歌之前有一部弦又在弄
後又有但曲七曲廣陵散黃老彈飛引大
胡笳鳴小胡笳鳴鷓鴣雞游弦流楚窈窕並
琴箏笙筑之曲王錄所無也其廣陵散一
曲今不傳

白頭吟二首五解

古辭

古今樂錄曰王僧虔技錄曰白頭吟行歌
古皚如山上雪篇西京雜記曰司馬相如

將聘茂陵人女為妾卓文君作白頭吟以
自絕相如乃止樂府解題曰古辭云皚如
山上雪皎若雲間月又云願得一心人白
頭不相離始言良人有兩意故來與之相
決絕次言別於溝水之上叙其本情終言
男兒重意氣何用於錢刀若宋鮑照直如
朱絲繩陳張正見平生懷直道唐虞世南
氣如幽徑蘭皆自傷清直芬馥而遭鑠金

玷玉之謗君恩以薄與古文近焉一說云
白頭吟疾人相知以新間舊不能至於白
首故以為名唐元稹又有決絕詞亦出於
此

皚如山上雪皎若雲間月聞君有兩意故來相決絕解一
平生共城中何嘗斗酒會今日斗酒會明旦溝水頭蹀
蹀御溝上溝水東西流解二郭東亦有樵郭西亦有樵兩
樵相推與無親為誰驕解三淒淒重淒淒嫁娶亦不啼願

得一心人白頭不相離解四竹竿何嫋嫋魚尾何離篴男

兒欲相知何用錢刀為齧如如字下或有五字馬噉冀川上高

士嬉今日相對樂延年萬歲期解五

右一曲晉樂所奏

皚如山上雪皎若雲間月聞君有兩意故來相決絕今
日斗酒會明旦溝水頭躑躑御溝上溝水東西流淒淒
復淒淒嫁娶不須啼願得一心人白頭不相離竹竿何
嫋嫋魚尾何篴篴男兒重意氣何用錢刀為

右一曲本辭

白頭吟

鮑照

直如朱絲繩清如玉壺冰何慙宿昔意猜恨坐相仍人
情賤恩舊世路逐衰興毫髮一為瑕丘山不可勝食苗
實碩鼠黠白信蒼蠅鳬鵠遠成美薪芻前見凌申黜褒
女進班去趙姬升周王日淪惑漢帝益嗟稱心賞固難
恃貌恭豈易憑古來共如此非君獨撫膺

同前

張正見

平生懷直道，桂松比真風。
語默妍媸際，沈浮毀譽中。
讒新恩易盡，情去寵難終。
彈珠金市側，抵玉春山東。
含香老顏駟，執戟異揚雄。
惆悵崔亭伯，幽憂馮敬通。
王嬙沒故塞，班女棄深宮。
春苔封履跡，秋葉奪妝紅。
顏如花落槿，鬢似雪飄蓬。
此時積一作即長歎，傷年誰復同。

同前

劉希夷

洛陽城東桃李花，飛來飛去落誰家。
洛陽女兒惜顏色，行逢落花長歎息。
今年花落顏色改，明年花開復誰在。

已見松栢摧為薪更聞桑田變成海古人無復洛城東
今人還對落花風年年歲歲花相似歲歲年年人不同
寄言金盛紅顏子須憐半死白頭翁此翁白頭真可憐
伊昔紅顏美少年公子王孫芳樹下清歌妙舞落花前
光祿池臺文錦繡將軍樓閣畫神仙一朝卧病無人識
三春行樂在誰邊宛轉蛾眉能幾時須臾白髮亂如絲
但看舊來歌舞地唯有黃昏鳥雀悲

同前二首

李白

錦水東北流波蕩雙鴛鴦雄巢漢宮樹雌弄秦草芳寧
同萬死碎綺翼不忍雲間兩分張此時阿嬌正嬌妬獨
坐長門愁日暮但願君恩顧妾深豈惜黃金將買賦一作

賈詞賦

相如作賦得黃金丈夫好新多異心一朝將聘茂

陵女文君因贈

賦一作

白頭吟東流不作西歸水落花辭

條歸故林兔絲固無情隨風任顛倒誰使女蘿枝而來
彊縈抱兩草猶一心人心不如草莫卷龍鬚席從他生
網絲且留琥珀枕或有夢來時覆水再收豈滿杯棄妾

已去難重回古時得意不相負祇今唯見青陵臺

錦水東流碧波蕩雙鴛鴦雄巢漢宮樹雌弄秦草芳相
如去蜀謁武帝赤車駟馬生輝光一朝再覽大人作萬
乘忽欲凌雲翔聞道阿嬌失恩寵千金買賦要君王相
如不憶貧賤日官高金多聘私室茂陵姝子皆見求文
君歡愛從此畢淚如雙泉水行墮紫羅襟五更雞三唱
清晨白頭吟長吁不整綠雲鬢仰訴青天哀怨深城崩
杞梁妻誰道土無心東流不作西歸水落花辭枝羞故

林頭上玉鶯釵是妾嫁時物贈君表相思羅袖幸時拂
莫卷龍鬚席從他生網絲且留琥珀枕還有夢來時鷓
鴒表在錦屏上自君一挂無由披妾有秦樓鏡照心勝
照井願持照新人雙對可憐影覆水却收不滿杯相如
還謝文君回古來得意不相負祇今唯有青陵臺

同前

張籍

請君膝上琴彈我白頭吟憶昔君前嬌笑語兩情宛轉
如縈素宮中為我起高樓更聞華池種芳樹春天百草

秋始衰棄我不待白頭時羅襦玉珥色未暗今朝已道
不相宜揚州青銅作明鏡暗中持照不見影人心回互
自無窮眼前好惡那能定君恩已去若再返菖蒲花生
月長滿

反白頭吟

白居易

鮑照作白頭吟白居易反其致為反白頭
吟

炎炎者烈火營營者小蠅火不熱真玉蠅不點清水此

苟無所受彼莫能相仍乃知物性中各有能不能古稱
怨報死則人有所懲懲淫或應可在道未為弘譬如蜩
鷄徒啾啾啁龍鵬宜當委之去寥廓高飛騰豈能泥塵
下區區酬怨憎胡為坐自苦吞悲仍撫膺

決絕詞三首

元稹

乍可為天上牽牛織女星不願為庭前紅槿枝七月七
日一相見故心終不移那能朝開暮飛去一任東西南
北吹分不兩相守恨不兩相思對面且如此背面當何

知春風撩亂伯勞語此時拋去時握手苦相問竟不言
後期君情既決絕妾意已參差借如死生別安得長苦
悲

噫春水之將泮何余懷之獨結有美一人於焉曠絕一
日不見比一日於三年况三年之曠別水得風兮小而
已波筍在芭兮高不見節矧桃李之當春競衆人之攀
折我自顧悠悠而若雲又安能保君皓皓之如雪感破
鏡之分明覩淚痕之餘血幸他人之既不我先又安能

使他人之終不我奪已焉哉織女別黃姑一年一度暫
相見彼此隔河何事無

夜夜相抱眠幽懷尚沈結那堪一年事長遣一宵說但
感久相思何暇暫相悅虹橋薄夜成龍駕侵晨列生憎
野鵲往遲回死恨天雞識時節曙色漸瞳矐華星次明
滅一去又一年一年何時可一作徹有此迢遞期不如生
死別天公既是妬相憐何不便教相決絕

泰山吟

陸機

古今樂錄曰王僧虔技錄有泰山吟行今
不歌樂府解題曰泰山吟言人死精魄歸
於泰山亦薤露蒿里之類也

泰山一何高迢迢造天庭峻極周已遠層雲鬱冥冥梁
甫亦有館蒿里亦有亭幽塗延萬鬼神房集百靈長吟
太山側慷慨激楚聲

同前

謝靈運

岱宗秀維岳崔嵬刺雲天岵嶸旣嶮巖觸石輒芊眠登

封瘞崇壇降禪藏肅然石閭何晦藹明堂祕靈篇

梁甫吟

諸葛亮

古今樂錄曰王僧虔技錄有梁甫吟行今
不歌謝希逸琴論曰諸葛亮作梁甫吟陳
武別傳曰武常騎驢牧羊諸家牧豎十數
人或有知歌謠者武遂學太山梁甫吟幽
州馬客吟及行路難之屬蜀志曰諸葛亮
好為梁甫吟然則不起於亮矣李勉琴說

曰梁甫吟曾子撰琴操曰曾子耕太山之
下天雨雪凍旬月不得歸思其父母作梁
山歌蔡邕琴頌曰梁甫悲吟周公越裳按
梁甫山名在泰山下梁甫吟蓋言人死葬
此山亦葬歌也又有泰山梁甫吟與此頗
同

步出齊城門遙望蕩陰里中有三墓累累正相似問
是誰家墓田疆古冶子力能排南山文能絕地紀一朝

被讒言二桃殺三士誰能為此謀國相齊晏子

同前

陸機

王衡既

一作固

已驂羲和若飛凌四運若環轉寒暑自相

懲冉冉年時暮迢迢天路徵招搖東北指大火西南升
悲風無絕響玄雲互相仍豐水憑川結霜露彌天凝年
命時相逝慶雲鮮克乘履信多愆期思順焉足憑愴愴

一作
慷慨

臨川響非此孰為興哀吟梁甫巔慷慨獨撫膺

同前

沈約

龍駕有馳策日御不停陰星籥亟迴變氣化坐盈侵寒
光稍眇眇秋塞日沉沉高窓灰餘火傾河駕騰參飈風
折算草驚竿實層林時雲靄空遠淵水結清深奔樞豈
易紐珠庭不可臨懷仁每多意履順孰能禁露清一唯
促緩志且移心哀歌步梁甫歎絕有遺音

同前

陸 瓊

臨淄佳麗地年少習名倡似笑脣朱動非愁眉翠揚掩
抑隨竿轉和柔會瑟張輕扇屢迴指飛塵亟繞梁寄言

諸葛相此曲作難忘

同前

李白

長嘯梁甫吟何時見陽春君不見朝歌屠叟辭棘津八

十西來釣渭濱寧羞白髮照淥水逢時吐一作壯氣思經

綸廣張三千六百釣風期暗與文王親大賢虎變愚不

測當年頗似尋常人君不見高陽酒徒起草中長揖山

東隆準公入門不拜一作開說騁雄辯兩女輟洗來趨風東

下齊城七十二指麾楚漢如旋蓬狂生落拓尚如此何

况壯士當羣雄我欲攀龍見明主雷公砰訇震天鼓帝
旁投壺多玉女三時大笑開電光倏爍晦冥起風雨閭
闔九門不可通以額叩闕閤者怒白日不照吾精誠杞
國無事憂天傾楔獠磨牙競人肉騶虞不折生草莖手
接飛猱搏彫虎側足焦原未言苦智者可卷愚者豪世
人見我輕鴻毛力排南山三壯士齊相殺之費二桃吳
楚弄兵無劇孟亞夫哈爾為徒勞梁甫吟梁甫吟聲正
悲張公兩龍劍神物合有時風雲感會起屠釣大人峴

岷當安之

泰山梁甫行

曹植

樂府解題曰曹植改泰山梁甫為八方

八方各異氣千里殊風雨劇哉邊海民寄身於草墅妻
子象禽獸行止依林阻柴門何蕭條孤兔翔我宇

東武吟行

陸機

古今樂錄曰王僧虔技錄有東武吟行今
不歌樂府解題曰鮑照云主人且勿喧沈

約云天德深且曠傷時移事異榮華徂謝
也左思齊都賦注云東武太山皆齊之土
風弦歌謳吟之曲名也通典曰漢有東武
郡今高密諸城縣是也

投跡短世間高步長生闡濯髮冒雲冠洗身被羽衣飢
從韓衆餐寒就佚女棲

同前

鮑照

主人且勿誼賤子歌一言僕本寒鄉士出身蒙漢恩始

隨

一作逢

張校尉召募到河源後逐李輕車追虜出塞垣

密途亘萬里寧歲猶七奔肌力盡鞍甲心思歷涼溫將
軍既下世部曲亦罕存時事一朝異孤績誰復論少壯
辭家去窮老還入門腰鑣刈葵藿倚杖牧雞豚昔如韝
上鷹今似檻中猿徒結千載恨空負百年怨棄席思君
幄疲馬戀君軒願垂晉主惠不愧田子魂

同前

沈約

天德深且曠人世淺而浮東枝栽拂景西壑已停翰逝

辭金門寵去飲玉池流霄轡一永矣俗累從此休

東武吟

李白

好古咲流俗素聞賢達風方希佐明主長揖辭成功
白日在高天回光燭微躬恭承鳳凰詔歛起雲蘿中清切
紫霄迴優游丹禁通君王賜顏色聲價凌煙虹乘輿擁
翠蓋扈從金城東寶馬麗絕景錦衣入新豐倚巖望松
雪對酒鳴絲桐因學楊子雲獻賦甘泉宮天書美片善
清芬播無窮歸來入咸陽談笑皆王公一朝去金馬飄

落成飛蓬賓友日疎散玉樽亦已空才力猶可倚

一作待

不慙世上雄間作東武吟曲盡情未終書此謝知己吾

尋黃綺翁

一作扁舟
尋釣翁

怨詩行

古辭

古今樂錄曰怨詩行歌東阿王明月照高樓一篇王僧虔技錄曰荀錄所載古為君一篇今不傳琴操曰卞和得玉璞以獻楚懷王王使樂正子治之曰非玉刖其右足

平王立復獻之又以為欺刖其左足平王
死子立復獻之乃抱玉而哭繼之以血荆
山為之崩王使剖之果有寶乃封和為陵
陽侯辭不受而作怨歌焉班婕妤怨詩行
序曰漢成帝班婕妤失寵求供養太后於
長信宮乃作怨詩以自傷託辭於紈扇云
樂府解題曰古詞云為君既不易為臣良
獨難言周公推心輔政二叔流言致有雷

雨拔木之變梁簡文十五頗有餘自言姝
豔以譏見毀又曰持此傾城貌翻為不肖
軀與古文意同而體異若傳休奕怨歌行
云昭昭朝時日皎皎最明月蓋傷十五入
君門一別終華髮不及偕老猶望死而同
穴也

天德悠且長人命一何促百年未幾時奄若風吹燭嘉
賓難再遇人命不可續齊度遊四方各繫太山錄人間

樂未央忽然歸東嶽當須盡中情遊心恣所欲

同前二首七解

曹植

明月照高樓流光正徘徊上有愁思婦悲歎有餘哀

解一

借問歎者誰自云客子妻夫行踰十載賤妾常獨棲

解二

念君過於渴思君劇於飢君為高山柏妾為濁水泥

解三

北風行蕭蕭烈烈入吾耳心中念故人淚墮不能止

解四

沈浮各異路會合當何諧願作東北風吹我入君懷

解五

君懷常不開賤妾當何依恩情中道絕流止任東西

解六

我欲竟此曲此曲悲且長今日樂相樂別後莫相忘解

右一曲晉樂所奏

明月照高樓流光正徘徊上有愁思婦悲歎有餘哀借
問歎者誰言是客子妻君行踰十年孤妾常獨棲君若
清路塵妾若濁水泥浮沈各異勢會合何時諧願為西
南風長逝入君懷君懷時不開妾心當何依

右一曲本辭

同前

梅陶

庭植不材柳花育能鳴鶴鼓枝遊畦畝棲釣一邱壑最
悅朝敷榮夕乘南音客畫立薄遊景暮宿漢陰魄庇身
陰王猷罷蹇反幻迹

同前

僧孝休

明月照高樓含君千里光巷中情思滿斷絕孤妄腸悲
風盪帷帳瑤翠坐自傷妾心依天末思與浮雲長嘯歌
視秋草幽葉豈再揚暮蘭不待歲籬華能幾芳願作張
女引流悲繞君堂君堂嚴且祕絕調徒飛揚

怨詩

阮瑤

民生受天命漂若河中塵雖稱百齡壽孰能應此身猶

獲嬰凶禍流落

一作離

恒苦辛

同前

陶潛

天道幽且遠鬼神茫昧然結髮念善事僂俛五十

一作六十九

年弱冠逢世阻始室喪其偏炎火屢焚如螟蟻恣中田

風雨縱橫至收斂不盈廔夏日長抱飢寒夜無被眠造

夕思雞鳴及晨願鳥遷在已亦何怨

一作何怨天

離憂悽目

前吁嗟身後名於我若浮煙慷慨激一作獨悲歌鍾期信
為賢

同前

梁簡文帝

秋風與白團本自不相安新人及故愛意氣豈能寬黃
金肘後鈴白玉樓前盤誰堪空對此還成無歲寒

同前

劉孝威

退寵辭金屋見譴斥甘泉枕席秋風起房櫳明月懸燭
避窓中影香迴爐上烟丹庭斜草逕素壁點苔錢歌起

蒲生曲樂奏下山弦新聲昔廣宴餘杯今自傳王嬙向
絕漢宗女入邠連雁書猶未返馬角無歸年昭臺省滕
御曾坂無棄捐後薪隨復積前魚誰復憐

同前

張正見

新豐妖冶地遊俠競嬌奢池臺間羅綺桃李雜煙霞
影分連騎衣香合並車艷粉驚飛蝶紅妝映落花舞衫
飄冶袖歌扇掩團紗玉床珠帳卷金樓鏡月斜還疑蕭
史鳳不及李倫家

同前二首

江總

採桑歸路河流深憶昔相期柏樹林
奈許新繭傷妾意無由故劍動君心

新梅嫩柳未障羞情去思移那可留團扇篋中言不分
纖腰掌上詎勝愁

樂府詩集卷四十一